

II - ARABAKO LURRALDE HISTORIKOAREN TOKI ADMINISTRAZIOA

VITORIA-GASTEIZKO UDALA

EKONOMIA SUSTAPENAREN, ENPLEGUAREN,
MERKATARITZAREN ETA TURISMOAREN SAILA

Vitoria-Gasteizen lan-kontrataziorako laguntza ekonomikoak emateko udal programaren berriazko oinarriak eta deialdia, Lanbide Euskal Enplegu Zerbitzuaren enplegua sustatzeko tokiko ekintzetarako 2020ko ekitaldiko laguntza-deialdiaren barruan

2019ko abenduaren 9an onetsi zituen Tokiko Gobernu Batzarrak Vitoria-Gasteizko Udalaren 2020ko dirulaguntzen deialdiak arautuko dituzten oinarri orokorrak. 2019ko abenduaren 23ko ALHAOn — 147. zk. — argitaratu ziren oinarri orokor horiek, eta Udalaren webgunean kontsulta daitezke — www.vitoria-gasteiz.org —, baita herritarrei laguntzeko bulegoetan ere. Berriazko deialdi honetara aurkeztu nahi duten pertsona eta entitateek oinarri orokor horietara jo beharko dute jakiteko non eta nola aurkeztu eskabideak, zein betekizun eta betebeharrak izango dituzten eskatzaileek, nola justifikatu behar dituzten dirulaguntzak, zein formulario baliatu behar dituzten eta abar.

2020ko abenduaren 9ko aparteko bilkuran onetsi zituen Tokiko Gobernu Batzarrak Vitoria-Gasteizen lan-kontrataziorako laguntza ekonomikoak emateko udal programaren deialdi publikoa eta oinarri arautzaileak, Lanbide Euskal Enplegu Zerbitzuaren enplegua sustatzeko tokiko ekintzetarako 2020ko ekitaldiko laguntza deialdiaren barruan. Horrenbestez, oinarri horiek argitara ematen dira, denak jakinaren gainean egon daitezten:

1. oinarria. Dirulaguntzen ildoak

Eskualdeko VIII. Enplegu Planaren barruko lan-kontrataziorako laguntzak, 2020.

2. oinarria. Deialdiaren xedea

COVID-19ak eragindako osasun-krisiaren kudeaketarako alarma-egoera deklaratu zuen martxoaren 14ko 463/2020 Errege Dekretuan ezarritako ezohiko neurriak kolpe gogorra izan dira hiriko sistema produktibo eta ekonomikoarentzat.

Udalerriko langabeen lan-kontratazioa bultzatzea da oinarri hauen xedea, COVID-19aren pandemiak eragindako ezohiko krisi ekonomikoaren eta langabeziaren hazkundearen testuinguruan. Helburu horrekin, konkurrentzia sinplearen erregimenean laguntza ekonomikoak emateko baliatuko diren baldintzak ezartzen dira, ohiko merkatuan lanaldi osoko nahiz partzialeko kontratazioa sustatu eta errazteko, Vitoria-Gasteizko udalerrian.

Lanbide-Euskal Enplegu Zerbitzuan enplegu eskatzaile gisa izena emanda dauden Vitoria-Gasteizko langabeak kontratatzea zuzenduta daude laguntzak, bereziki lan-merkatuan sartzeko zailtasun bereziak dituzten pertsonak kontratatzeari lehentasuna ematen zaiolarik.

Itzuli beharrik gabeko dirulaguntzak izango dira laguntza ekonomiko horiek.

3. oinarria. Enpresa edo entitate onuradunen betekizunak, eta kontratatzen diren pertsonenak

Betekizun hauek betetzen dituzten enpresa edo entitateek jaso ahal izango dituzte programa honetako dirulaguntzak, edozein delarik ere haien forma juridikoa:

1. Diruz laguntzeko moduko jarduerak garatzea, zuzenean, Vitoria-Gasteizko udalerriko lan-toki batean.

2. Zerga- eta lan-betebeharrak egunean edukitzea, baita Vitoria-Gasteizko Udalari dagozkionak ere.

3. Administrazio-bidean edo bide penalean zigortua eta laguntza publikoak eskuratzeko aukeratik apartatua ez egotea, ezta horretarako ezgaitzen duen inongo legezko debekuren menpe ere, Emakume eta gizonen arteko benetako berdintasun eragingarrirako martxoaren 22ko 3/2007 Lege Organikoaren arabera sexu-arrazoiengatik diskriminaziotzat jotzen diren egintzen ondorio direnak barne.

4. Beste dirulaguntzarik ez jaso izana, pertsona bera kontratatzeke, Vitoria-Gasteizko enpresei lan-kontratatziorako laguntza ekonomikoak emateko udal programaren aurreko deialdietan.

5. Baldintza horiek betetzen jarraitzea, ebazpena eman arte.

6. Ondasun-erkidegoen edo elkarte zibilen kasuan, horietan partaidetza duten pertsona fisiko edo juridiko pribatu guztiak joko dira onuraduntzat, eta guztiek bete beharko dituzte oinarri hauetan ezarritako betekizun eta baldintzak. Nolanahi ere, taldea ordezkatzeko duen pertsona bat izendatu beharko da, onuradun den aldetik hari dagozkion betebeharrak betetzeko nahikoa ahalmen aitortzen zaiolarik. Emandako dirulaguntza itzuli egin beharko da, elkartea Dirulaguntzei buruzko azaroaren 17ko 38/2003 Legearen 39. eta 65. artikuluetan aurreikusitako preskripzio-epea baino lehen desegiten bada.

Kontratatuko direnek baldintza hauek bete beharko dituzte, indarrean dagoen legediak agintzen dituen gain:

1. Vitoria-Gasteizko udalerrian erroldatuta egotea kontratazio-egunean, eta hala jarraitzea gutxienez ere laguntza ematen den egunera arte, ematen bada.

2. Langabezian egotea, hau da, kontratatu aurretik Gizarte Segurantzaren inongo erregiminetan izena emanda ez egotea, eta Lanbide Euskal Enplegu Zerbitzuan enplegu-eskatzaille gisa izena emanda egotea, kontratazio-egunaren aurre-aurreko egunean.

4. oinarria. Diruz lagundu daitezkeen ekintzak

— Oinarri hauetan ezartzen diren baldintzak betetzen direlarik egiten diren lan-kontratazioak.

— Kontratuen gutxienerako iraupena hiru hilabetekoa izango da, lanaldi osokoa nahiz partzialekoa izan —gutxienez ehuneko 50ekoa—, eta edozein kontratazio-modalitatetan formalizatu ahal izango dira, prestakuntza- eta ikaskuntza-kontratua salbu. Kontratuaren iraupena zenbatzeko, luzapenak kontuan hartuko dira, baldin eta hasierako kontratua gutxienez hiru hilabetekoa bada.

— Dirulaguntzaren iraupena gehienez sei (6) hilabetekoa izango da, kontratu bakoitzeko.

— 2020ko uztailaren 1etik 2021ko ekainaren 30era bitartean egindako kontratuak lagundu ahalko dira. Nolanahi ere, kontratazioak diruz laguntzeko den epea baino luzeagoak izan daitezke, baina halakoetan ez da dirulaguntzarik jasoko geroko epe horri dagozkion kostuengatik.

— Galdatu edo diruz lagundutako gutxienerako aldia burutu aurretik iraungitzen badira lan-kontratuak, itzuli egin beharko da emandako dirulaguntza. Kontratatzeko duen enpresaren borondatearekin zerikusirik ez duten arazoiengatik geratzen bada bertan behera kontratua —probaldia ez gainditzea, lanpostua norberaren borondatez uztea, kontratatua kaleratzea bidezko jotzea edo heriotza nahiz ezintasuna—, eta hala egiaztatzen delarik, murriztu egingo da dirulaguntzaren zenbatekoa, kontratuaren benetako iraupenarekiko proportzioan. Horrez gain, 15 egun baliaduneko epean, gelditzen den diruz lagundutako aldirako beste lan-kontratu bat formalizatzen bada —deialdiko baldintzak eta dirulaguntza eman zeneko hasierako kontratuaren ezaugarriak errespetatuz—, izenpetutako lehen eta bigarren kontratuen iraupenaren arabera izango da dirulaguntzaren murrizketa. Delako bigarren kontratua behar baino lehenago iraungiz gero, ez da onartuko emandako dirulaguntza gerora izenpetzen diren hirugarren edo hurrengo kontratuei aplikatzea.

— Ez da dirulaguntza bat baino gehiago emango pertsona bera kontratatzeagatik, nahiz eta eskaera enpresa edo pertsona autonomo desberdinek egin —halakorik egokitzuz gero, eskabidea aurkeztu den hurrenkera aintzat hartuko da dirulaguntza bakar hori emateko—.

5. oinarria. Dirulaguntzaren xede izango ez direnak

— Enpresaren titulartasunaren ondorengotzatik edo forma juridikoaren aldaketatik sortzen diren hasierako kontratazioetarako.

— Enpresaburuen ezkontideak, ondorengoak edo bigarren mailara arteko —hori barne— odol- edo ezkontza-ahaidetasuna duten senideak —edo horien parekoak, izatezko bikoteen kasuan— kontratatzeko, edo zuzendaritza-karguetan diharduten nahiz administrazio-organoe-tako kide direnak.

— Enpresa berak langile bera kontratatzea, baldin eta aurreko deialdietan dirulaguntza jasoa bada.

— Laguntza eskatzen duten sozietateetan partaidetzak dituzten edo kontratazioaren aurreko urtean izan dituzten pertsonen dagozkien kontratazioak.

— Prestakuntza- eta ikasketa-kontratuetaarako.

Era berean, ezingo dira laguntza hauetaz baliatu:

— Dirulaguntzen Lege Orokorraren 13. artikuluko debeku egoeraren batean dauden enpresa edo entitateak.

— Administrazio publikoak, sozietate publikoak eta haiekin loturarik duten edo haien mendeko diren entitateak.

— Aldi baterako lanerako enpresak, beste enpresa bati aldi baterako langileak kontratatzeari dagokionez.

— Vitoria-Gasteizko Udalak nahiz beraren enpresa edo erakunde autonomoek esleitutako kontratuak gauzatzeko egindako lan-kontratazioak.

— Langileen Estatutuaren Legearen Testu Bateginak —urriaren 23ko 2/2015 Legegintzako Errege Dekretuaren bidez onetsia— 2.1 artikuluan aipatzen dituen lan-harreman bereziak.

— Deialdi honetan aurreikusten diren enpresentzako laguntzek Europako Batzordearen 2013ko abenduaren 18ko 1407/2013 Erregelamenduan ezarritako “minimis” araua bete beharko dute —2013ko abenduaren 24ko Europar Batasunaren Aldizkari Ofiziala, L352—, Europar Batasunaren Tratatuaren 107. eta 108. artikulua “minimis” laguntzei aplikatzeari buruzkoa.

6. oinarria. Baliabide ekonomikoak

Deialdiaren diru-zuzkidura, guztira, hiru milioi laurehun eta hamalau mila eurokoa (3.414.000,00 euro) izango da, 2020. urteko udal-aurrekontuko 0823.2411.480.15 “Lanbideren Eskualdeko Planeko ekarpena” partidaren kontura.

7. oinarria. Indarrean jartzea eta eskabideak aurkezteko epeak

ALHAOn argitaratzen diren egunaren biharamunean jarriko dira indarrean oinarri hauek —aldez aurretik Dirulaguntzen Datu-base Nazionalen laburpen-iragarkia argitaratuko da—.

Eskabideak aurkezteko hiru aldi ezarriko dira:

1. Deialdia ALHAOn argitaratzen den egunaren biharamunetik 2021eko otsailaren 15era arte.
2. 2021eko otsailaren 16tik apirilaren 14ra arte.
3. 2021ko apirilaren 15etik ekainaren 30era arte.

Enpresa edo pertsona interesdunek eskabidea aurkezteak, oinarri hauek onartzen dituztela esan nahiko du.

I. eta II eranskinetako eskabide-eredua baliatuz aurkeztu beharko dute eskabidea interesatuta dauden enpresek, herritarrei laguntzeko bulegoetan eta San Martineko udal eraikinean (Teodoro Dublang Margolariaren kalea, z/g) edo Vitoria-Gasteizko Udalaren egoitza elektronikoan. Orobat aurkeztu ahal izango dute legez aurreikusitako gainerako moduetan, Administrazio Publikoen Administrazio Erkidearen urriaren 1eko 39/2015 Legearen ildotik.

Eskabidea postaz bidaltzen bada, mezu elektronikoa bat igorri beharko da, bidalketaren ordezkagiriarekin, helbide honetara: ayudascontratacion@vitoria-gasteiz.org.

Eskabideak epe kanpo aurkezten badira, ezetsi egingo dira.

8. oinarria. Ebazteko epea

Prozeduraren ebazpena eman eta argitaratzeko gehieneko epea sei hilabetekoa izango da, dirulaguntza-eskabideak aurkezteko epea bukatzen den egunaren biharamunetik. Eskabideak ezetsitatzeko ahal izango dituzte interesdunek, administrazioaren isiltasuna dela medio, baldin eta aurreko paragrafoan adierazitako gehieneko epea igarotzen delarik berariazko ebazpenik eman eta jakinarazi ez bada —urriaren 1eko 39/2015 Legearen 25. artikuluan xedatutakoaren ildotik—.

Hautatze-prozedurarako bakoitzak ebazteko epe berri bat irekitzea ekarriko du berekin.

9. oinarria. Dirulaguntza kalkulatzea

Gehienez 6.000,00 euroko laguntza emango da sei hilabeteko edo hortik gorako lanaldi osoko lan-kontratu bakoitzeko.

Lanaldi partzialeko kontratazioak badira, lanaldiaren edo lanean egindako denboraren arabera izango da dirulaguntza (laguntzaren gehienezko muga).

Laguntzaren azken zenbatekoa ezingo da izan kontratatutako pertsonen soldata-kostuen eta Gizarte Segurantzako ehuneko 75etik gorakoa, kontratu-amaierako kalte-ordainak barne.

Talde hauetakoren bateko pertsonak kontratatzen badira:

— diru-sarrerak bermatzeko errenta jasotzen dutenak.

— 35 urtetik beherakoak.

— luzaroko langabeak. Luzaroko langabetzat joko dira kontratatu aurreko gutxienez 540 egunetan Lanbide Euskal Enplegu Zerbitzuan enplegu-eskatzaile gisa izena emanda egon direnak, baldin eta aldi horretan gutxienez 360 egunez lanik gabe egon badira.

— 55 urtetik gorakoak.

Laguntzaren gehieneko zenbatekoa 9.000,00 eurokoa izango da, sei hilabeteko edo hortik gorako lanaldi osoko lan-kontratu bakoitzeko. Lanaldi partzialeko kontratazioa bada, lanaldiaren edo lanean egindako denboraren arabera izango da dirulaguntza. Kasu horretan, laguntzaren azken zenbatekoa ezingo da izan kontratatutako pertsonen soldata-kostuen eta Gizarte Segurantzako ehuneko 100etik gorakoa, kontratu-amaierako kalte-ordainak barne.

Dirulaguntzen zenbateko guztiak ehuneko 10 handituko dira kontratuak emakumeei egiten zaizkielarik.

Nolanahi ere, dirulaguntzak emateko ebazpena baldintzatuta egongo da, kreditu egokia eta nahikoa dagoen ere.

10. oinarria. Dirulaguntza ordaintzea

Laguntzak ordaintzea bakarrean ordainduko dira, kontratazioa egin dela eta laguntza emateko eskatutako betekizunak betetzen direla egiaztatu ondoren —deialdi honen 13. oinarrian adierazten den moduan—; ematera bultzatu duten baldintzak egiaztatzeko bestelako kontrolak ere ezar litezke.

Dirulaguntza onartutzat joko da baldin ematen deneko ebazpena argitaratzen denetik 10 eguneko epea igarotzen delarik berariaz uko egin ez bazaio.

11. oinarria. Pertsona edo enpresa onuradunen betebeharrak

Dirulaguntzen Lege Orokorraren 14. artikuluan xedatutakoa gorabehera, betebeharrak izango dituzte onuradunek:

1. Laguntza emateko arrazoia izan den jarduera betetzea eta bete dela egiaztatzea, hau da, lan-kontratua formalizatzea, eta emateko betekizunak eta baldintzak betetzea.

2. Vitoria-Gasteizko Udalaren egiaztatze-ekintzen eta bertako kontu-hartzaile nagusiaren finantza-kontrolerako ekintzen mende jartzea, baita Herri Kontuen Euskal Epaitegiaren arauetan aurreikusitakoen mende ere.

3. Zerga-betebeharrak bete eta Gizarte Segurantzari nahiz Vitoria-Gasteizko Udalari ordaindu beharrekoak ordaindu direla egiaztatzea.

4. Vitoria-Gasteizko Udaleko Ekonomia Sustapenaren, Enpleguaren, Merkataritzaren eta Turismoaren Sailari beharrezkotzat jotzen duen informazio eta agiri osagarri oro ematea, deialdi honetan jasotzen dituzten dirulaguntzak ulertu eta ebaluatzeko.

5. Udal laguntza honetarako aurkeztutako gastu beretarako bestelako laguntza edo dirulaguntzarik jasoz gero, organo emaileari jakinaraztea.

6. Jasotako funts publikoak itzultzea, Dirulaguntzei buruzko lege orokorraren 37. artikuluan adierazten diren kasuetan.

12. oinarria. Bestelako laguntza eta dirulaguntzekiko bateraezintasuna

Deialdi honetan aurreikusten diren dirulaguntzak bateraezintasunak izango dira kontzeptu berarengatik eta helburu berarekin beste administrazio publiko edo entitate publiko nahiz pribatu batzuek ematen dituzten dirulaguntza edo laguntzekin, Gizarte Segurantzak emandako hobariak salbu.

13. oinarria. Nahitaezko agiriak

Eskabidearekin batera agiri hauek aurkeztu behar dira, nahitaez:

— Eskabide-orria, eta zinpeko aitortpena, oinarri hauen I. eta II. eranskinetan ageri den ereduaren arabera —atal guztiak bete beharko dira, nahitaez—.

— Entitate eskatzailea egiaztatu eta identifikatzeko agiriak:

IFZ edo AIZ, autonomoen kasuan, edo enpresaren IFK.

Enpresa eratzeko eskritura, enpresaren estatutuak eta legezko ordezkariaren ahalmenaren egiaztapena.

Legezko ordezkariaren NANaren fotokopia.

Foru Ogasunari eta Gizarte Segurantzari ordaindu beharrekoak ordainduta edukitzearen ziurtagiria (Udalari ordaindu beharrekoak ordainduta dituen ofizioz egiaztatuko da).

Kontratazioaren bukaerako oroitidazkia, non soldata-kostua adierazi beharko baita, diruz lagundutako aldi guztira ordaindua, kalte-ordaina —beharrezkoa bada eta enpresaren Gizarte Segurantzako kostua bereizita.

— Kontratutako pertsona egiaztatzeko agiriak:

Kontratuaren NANA edo AIZ.

Errola ziurtagiri historikoa.

Kontratuaren lan-bizitzaren txostena, gutxienez ere kontratazioaren aurreko urte eta erdia eta kontratazioaren ondorengo eguna barne direla.

Lanbide Euskal Enplegu Zerbitzuan izena emanda egondako aldien ziurtagiria, kontratua hasi aurreko azken 18 hilabeteetako.

Kontratua talde berezietakoren batekoa izanez gero, hori egiaztatze behar diren agiriak.

– Kontratua egiaztatze agiriak:

Aldeek sinatutako lan-kontratuaren kopia, Lanbide Euskal Enplegu Zerbitzuari kontratazio hori bide telematikoz jakinarazi izanaren egiaztagiriarekin batera.

Diruz lagundutako aldiari dagozkion nominak eta ordainketa-frogagiriak.

Vitoria-Gasteizko Udalak kontratazio gizartearekiko arduratsua eta iraunkorra egiteko jarraibidea – Gobernu Batzarrak 2015eko urriaren 16an onetsi zuena – aplikatuz, justifikazio-agiriak paper ehuneko 100 birziklatuan aurkeztea gomendatzen da (kontsumitu ondoko edukia gutxienez ehuneko 65ekoa), bi aldeetatik eta zuri-beltzean inprimatuta (kolorea ezinbestekoa denean bakarrik erabiliko da); koadernatzea ahalik eta urriena izango da, plastikozko azalik gabea, errazago birziklatzeko.

Deialdiari buruzko informazio eta dokumentazio guztia Vitoria-Gasteizko Udalaren webgunean egongo da eskuragarri (www.vitoria-gasteiz.org), baita herritarrei laguntzeko bulegoetan ere, ordutegi ofizialaren barruan.

Administrazio Publikoen Administrazio Prozedura Erkidearen urriaren 1eko 39/2015 Legearen 68. artikuluan aurreikusitakoa aplikagarri izango da.

Bide hauek baliatu ahal izango dira eskabidea eta nahitaezko dokumentazioa aurkezteko:

Dokumentazioa euskarri digitalean aurkeztea. Proiektu teknikoak eta gainerako agiriak euskarri digitalean aurkeztu ahal dira, formatu hauetan: USB memoria, CD, DVD edo antzekoak. Halakoetako artxibo grafiko eta testu-artxiboek pdf formatuan egon beharko dute, eta ez dute karpetarik eduki beharko, baizik eta agiri guztiak maila berean bilduta. Dokumentazioa euskarri digitalean aurkezten delarik, dagokion erantzukizunpeko aitortpena erantsi beharko zaio – Udalaren webgunetik deskarga daitekeen inprimakia baliatuz –. Eskabideak behar bezala izenpetuta edo ontzat emanda egon beharko du. Euskarri digitala ez zaio itzuliko entitate eskatzaileari.

Dokumentazioa paperean aurkeztea: Paperean aurkezten den dokumentazioak DIN A4 edo DIN A3 tamaina eduki beharko du, eta, herritarrei laguntzeko bulegoko digitalizatzeko lana errazte aldera, orri solteetan aurkeztu beharko da, grapa, klip edo multzokatzeko beste sistemarik erabili gabe. Eskabideari paperezkoa ez den euskarriaren batean dagoen dokumentazioa erantsi behar bazaio, eta, beraz, digitalizatzerik ez badago, karpeta batean aurkeztu beharko da, edukiaren aurkibidearekin, eta kanpoaldean etiketa jarrita, non zehazten den zein udal zerbitzuri dagokion deialdiko dirulaguntzen lerroa.

Egoitza elektronikoaren bidez: Eskabidea eta gainerako dokumentazioa online erregistratu ahal izango da, erregistro elektronikoaren bidez. Horretarako identifikazio-txartel digitala erabili beharko da, <https://sedeelectronica.vitoria-gasteiz.org> helbidean ezarritakoari jarraituz.

14. oinarria. Akatsak zuzentzea

Dirulaguntzaren eskabidea zuzen formalizatuta ez dagoenean edo daturen bat falta zaiotenean, edo eskatutako agiriren bat aurkezten ez bada, pertsona edo entitate eskatzaileari akatsa konpontzeko eskatu beharko zaio, eta ohartarazi hala egiten ez bada eskabidea beste barik artxibatuko dela.

Organo instrukzio-egileari dagokio deialdian galdetzen diren betebeharrak betetzen direla eta aurreko puntuan adierazitako dokumentazioa aurkeztu dela egiaztatzea, eta, hortaz, akatsak zuzentzeko eskatu ahal izango du, Dirulaguntzen Lege Orokorraren 23.5 artikulua ildotik.

Hala eskatzen zaielarik – 10 egun balioduneko gehieneko epe luzaezinean – dokumentazioa aurkezten ez duten edo akatsak zuzentzen ez dituztenek eskabidea bertan behera utzi dutela ulertuko da.

15. oinarria. Prozedura

Konkurrentzia sinplea eta deialdi irekia izango da dirulaguntzak emateko prozedura. Deialdi honi dagozkionetarako, konkurrentzia sinpletzat joko da laguntzak — pertsona edo entitate onuradunak oinarri hauetan ezarritako betebeharrak betetzen dituela egiaztatu ondoren— sarrera-erregistroko hurrenkera kontuan harturik emateko prozedura — baldin eta deialdian ezarritako baldintzak betetzen badira eta, beti ere, Lanbide Euskal Enplegu Zerbitzuaren enplegua sustatzeko ekintza lokaletarako laguntzen deialdian ezarritako eskakizuna betetzen delarik, zein baita ematen diren laguntzen gutxienez ehuneko 40 emakumeak kontratatzeke izatea, eta aurrekontu-zuzkidurak aukera ematen duen neurrian—.

Aurkezten den dokumentazioan zer edo zer falta bada, eskatzaileak galdatzen zaion dokumentazio guztia aurkezten duen eguna joko da aurkezpen-datatzat.

Deialdi irekia denez gero, hiru hautatze-prozedura ezarri dira, hurrenez hurren, 7. oinarrian eskabideak aurkezteko finkatutako hiru aldiekin bat etorritik. Aldi bakoitza bukatzean, laguntzen ebazpen partziala egingo da, laguntzen gutxienez ehuneko 40 emakumeak kontratatzeke baliatzea eskatzen duen eskakizuna betez. Ehuneko hori ez betetzearen ondorioz aldi bakoitzetik kanpo geratzen diren eskabideak hurrengo aldira igaroko dira, harik eta jarduketa hauetarako aurreikusitako aurrekontu-zuzkidura agortu arte.

Nolanahi ere, dirulaguntzak emateko ebazpena baldintzatuta egongo da, ezinbestekoa izango baita ematen diren laguntzen gutxienez ehuneko 40 emakumeak kontratatzeke izatea, eta kreditu egokia eta nahikoa izatea.

Aldi bakoitzean emango den gehieneko zenbatekoa eskabideen bolumenaren arabera zehaztuko da, 0823.2411.480.15 partidaren ezarritako kredituaren gehieneko zenbatekoaren mugara arte.

Nolanahi ere, aldietako bat bukatzen delarik emateko dagoen kredituaren gehieneko zenbatekoa agortzen ez bada, hurrengo aldira aldatuko da baliatu gabeko zenbatekoa. Horretarako, aldatu beharreko zenbatekoa zehaztuko du laguntzak ematen dituen organoak, eta zein aldiri aplikatuko zaion. Edonola ere, horrek ezingo du izan jatorrizko aldiko eskatzaileen eskubidearen kalte.

Vitoria-Gasteizko Udaleko Ekonomia Sustapenaren, Enpleguaren, Merkataritzaren eta Turismoaren Sailari dagokio oinarri hauetan aurreikusten diren laguntzak kudeatzea. Aztertze-, balioztatze-, hautatze- eta jarraipen-batzorde bat eratuko da horretarako, saileko zuzendariak, Merkataritza eta Enpresa Zerbitzuetako buruek eta Prestakuntza eta Enplegu Ataleko Ataleko buruek osatua.

Eskabideak jaso eta —betebeharrak betetzen diren egiaztatu ondoren— tramitatzea onartzen delarik, balioespen-txosten teknikoa egingo da, eta, hautatze- eta jarraipen-batzordeak proposamena egiten diolarik, Tokiko Gobernu Batzarrak ebatziko ditu eskabideak, horretarako eskumena Ekonomia Sustapenaren, Enpleguaren, Merkataritzaren eta Turismoaren Saileko zinegotzi ordezkariari eskuordetzeko aukera gorabehera.

Deialdi honetako izapideak arintze aldera, helbide elektronikoko bat gaituta eduki beharko dute eskatzaileek tramitazioak iraun bitartean, operatibo, hartara aurkezten duten dokumentazioan aurkitzen diren akatsak zuzendu ahal izateko, edo eskatzen diren laguntzak arin eta eraginkortasunez, modu legalean, ebatzi ahal izateko beharrezko den beste edozein errekerimendu helarazi ahal izateko.

ALHAOren eta Vitoria-Gasteizko Udalaren iragarki-taularen bidez egingo dira dirulaguntzak emateko edo ukatzeko ebazpenaren jakinarazpenak, betiere Datu pertsonalak babesteari eta eskubide digitalak bermatzeari buruzko abenduaren 5eko 3/2018 Lege Organikoari jarraituz.

Dirulaguntzak emateko nahiz ezesteko erabakiak administrazio-bidea agortuko du, eta horren kontra, aukeran, berraztertzeke errekurtsioa aurkeztu ahal izango da, erabakia hartu duen organoari zuzenduta, hilabeteko epean, ALHAOn argitaratzen den egunaren biharamunetik; edo administrazioarekiko auzi-errekurtsioa, Vitoria-Gasteizko Administrazioarekiko Auzietarako Epaitegietan, bi hilabeteko epean, jakinarazten denetik.

16. oinarria. Dirulaguntzen publikotasuna

Oro har, ematen nahiz ukatzen diren dirulaguntzen zerrenda ALHAOn eta Udalaren webgunean argitaratuko da, pertsona edo enpresa eskatzaileak adierazten direlarik, baita emandako dirulaguntzaren zenbatekoa edo ukatzeko arrazoia ere.

Gardentasunari, informazio publikoa eskuratzeko bideari eta gobernu onari buruzko abenduaren 9ko 19/2013 Legearen 8. artikuluan xedatutakoaren ildotik, ematen diren dirulaguntza eta laguntzak Vitoria-Gasteizko Udalaren Gardentasun Atarian argitaratu beharko dira, xehetasun hauekin: zenbatekoa, xedea edo helburua eta onuradunak; guztia ere, Dirulaguntzei buruzko azaroaren 17ko 38/2003 Lege Orokorraren 20. artikuluan xedatutakoa gorabehera.

17. oinarria. Dirulaguntzak aldatzea

Dirulaguntzei buruzko azaroaren 17ko 38/2003 Legeak 64. artikuluan xedatzen duenez, emakida-ebazpena eman ondoren, onuradunak horren edukia aldatzea eska lezake, oinarri arautzaileetan horretarako aurreikusitako inguruabarrak badaude —legearen 17.3. l artikuluan ezarritakoa betez—, eta baimendu egin ahalko da, beti ere hirugarrenen kaltean ez bada. Jar-duera burutzeko epealdia amaitu baino lehen aurkeztu beharko da aldaketa egiteko eskabidea.

18. oinarria. Kontrolatu, ebaluatu eta ikuskatzea

Vitoria-Gasteizko Udalak, Ekonomia Sustapenaren, Enpleguaren, Merkataritzaren eta Turismoaren Sailaren bitartez, emandako laguntzak aurreikusitako xedeetara bideratzen direla bermatzeko beharrezko suertatzen diren kontrol- eta ebaluazio-ekintzak egin ahal izango ditu, eta eskatzen dien informazio osagarri guztia eman beharko diote enpresa onuradunek.

19. oinarria. Laguntzak itzultzea, eta horretarako prozedura

Ez da dirulaguntza ordainduko baldin eta Udalak emandako beste dirulaguntzaren bat artean justifikatu gabe badu pertsona edo entitate onuradunak, edo, lehendik emandako dirulaguntzaren bat itzultzeko eskatu zaiolarik, itzuli ez badu. Ezin izango da dirulaguntza ordaindu harik eta pertsona edo entitate onuradunak zerga-betebeharrak beteta eta Gizarte Segurantzari ordaindu beharrekoak ordainduta eduki arte; orobat, ez zaio ordainduko dirua itzultzeko prozedura baten ondorioz zordun bada.

Dirulaguntza eman zuen organoak izango du hura itzularazteko dosierra abiarazi eta, behar izanez gero, hala galdatzeko erabakia hartzeko eskumena.

Ofizios nahiz organo eskudunak edo interesdunak eskatuta abiarazi ahal izango da prozedura.

Horretarako probidentzia ematen delarik, dirua itzularazteko prozedura abiarazi dela jakinaraziko dio Udalak dirulaguntzaren onuradun den pertsonari edo enpresari, baita arrazoiak zein izan diren ere, eta entzunaldia eskainiko, egokitzen dituen alegazioak egin eta bidezkotzat jotzen dituen agiri edo justifikazioak aurkez ditzan, 15 eguneko epean.

Alegazioak jasotzen direlarik nahiz halakorik jaso gabe igarotzen delarik epea, ebazpen arrazoitua emango du Ekonomia Sustapenaren, Enpleguaren, Merkataritzaren eta Turismoaren Saileko zinegotzi ordezkariak, eta aurkez daitezkeen errekurtsoen berri adieraziko. Laguntza itzularazteko prozedura ebazteko gehieneko epea sei hilabetekoa izango da.

Ebazpenean urraketaren bat izan dela adierazten bada, galdutzat joko da laguntza jasotzeko eskubidea, eta, horrenbestez, oker jasotako dirua Udal Diruzaintzari itzultzeko obligazioa izango da; bi hilabeteko epean egin beharko da hori, jakinarazpena jasotzen denetik.

Borondatezko aldiko epeztat joko da epe hori.

Aurreikusitako epean itzultzen ez bada, premiamendu-prozedurari ekingo zaio, aplikagarri diren lege-araudiei jarraiki.

Itzularazteko prozedura administrazio arau-hauste baten ondorioz abiarazia bada, organo eskudunari jakinaraziko zaio, aplikagarri den prozedura zigortzaileari ekin diezaion.

20. oinarria. Indarrean jartzea

Deialdi honetan ezarritako prozedura Tokiko Gobernu Batzarrak 2019ko abenduaren 9an onetsitako oinarri orokorretan ezarritakoaren mende dago —2019ko abenduaren 23ko ALHAO, 174. zk.—, beti ere Dirulaguntzen Lege Orokorrean, haren araudian, Dirulaguntzei buruzko udal ordenantzian —2005eko ekainaren 17an onetsia; 2006ko urtarrilaren 13ko ALHAO, 5. zk.— eta deialdiaren oinarri orokorretan ezarritakoaren kontrakoa ez bada.

21. oinarria. Konfidentzialtasun-klausula

Datu pertsonalak babesteari eta eskubide digitalak bermatzeari buruzko abenduaren 5eko 3/2018 Lege Organikoa betetze aldera, Vitoria-Gasteizko Udaleko Ekonomia Sustapenaren, Enpleguaren, Merkataritzaren eta Turismoaren Sailak jakinarazten du eskatzaileen datu pertsonalak "Sailaren jardueren kudeaketa" izeneko fitxategian sartuko dituela —Ekonomia Sustapenaren, Enpleguaren, Merkataritzaren eta Turismoaren Sailaren jarduerak kudeatzea du xede fitxategi horrek—. Horien gaineko eskubideez baliatu nahi izanez gero —norberaren datuak ikusi, aldatu, ezeztatu edo kontra agertu—, Vitoria-Gasteizko Udaleko herritarrei laguntzeko bulegoetako batera jo beharko da.

Vitoria-Gasteizen, 2020ko abenduaren 10ean

*Ekonomia Sustapenaren, Enpleguaren, Merkataritzaren
eta Turismoaren Saileko Administrazio Orokorreko teknikaria
IGNACIO CEPEDA CRESPO*

I. eranskina

Dirulaguntza honekin lotuta egindako kontratazioaren ezaugarriak

<https://www.vitoria-gasteiz.org/docs/wb021/contenidosEstaticos/adjuntos/es/87/90/68790.pdf>

II. eranskina

Laguntza-eskabidea eta zinpeko aitortpena

<https://www.vitoria-gasteiz.org/docs/wb021/contenidosEstaticos/adjuntos/es/05/85/90585.pdf>